

CONVENIO MARCO DE COLABORACIÓN ENTRE O INSTITUTO GALEGO DO CONSUMO E DA COMPETENCIA E A UNIVERSIDADE DA CORUÑA PARA A REALIZACIÓN DE PRÁCTICAS EXTERNAS CURRICULARES DOS ESTUDANTES DA FACULTADE DE CIENCIAS DA UNIVERSIDADE DE A CORUÑA NO LABORATORIO DE CONSUMO DE GALICIA

Na nova ordenación das ensinanzas universitarias derivada da adaptación ao Espazo Europeo de Educación Superior (EEES), ponse especial énfase na realización de prácticas externas con valor académico en entidades públicas ou privadas, nacionais ou internacionais, desde a consciencia de que a combinación dunha axeitada formación teórica universitaria co coñecemento aplicado das técnicas e das metodoloxías desenvolvidas no campo profesional, constitúen a base máis sólida para a formación integral, ao capacitarse correctamente para a súa futura inserción no mercado laboral.

É por iso que

COMPARECEN

Por unha banda, _____, Reitor Magnífico da Universidade da Coruña, con enderezo social na rúa Maestranza s/n da Coruña e con _____ en nome e en representación da citada institución, no uso das atribucións que lle confire o art. 36.1.f) dos Estatutos desta universidade, aprobados polo Decreto 101/2004, de 13 de maio, da Xunta de Galicia (DOG de 26 de maio), modificado polo Decreto 194/2007 de 11 de outubro, polo que outorgan ao reitor a facultade para asinar convenios en nome da Universidade.

Por outra banda, _____, directora do Instituto Galego do Consumo e da Competencia, actuando no exercicio do seu cargo e en función das atribucións que lle confire o artigo 13 dos estatutos do IGCC publicados mediante Decreto 118/2016, do 4 de agosto, polo que se crea o Instituto Galego do Consumo e da Competencia (DOG nº 160, do 25 de agosto de 2016), e o artigo 1 da Resolución do 23 de marzo de 2017 sobre delegación de competencias en diversos órganos deste instituto (DOG nº 74, do 18 de abril de 2017).

Ambas as entidades recoñécense a súa respectiva personalidade e competencia para outorgar o presente convenio, polo que

ACORDAN

O establecemento dun convenio de colaboración educativa para a realización de prácticas académicas externas curriculares, de conformidade co Regulamento de Prácticas Académicas Externas da UDC, aprobado polo seu Consello de Goberno do 23 de abril de 2013. e as seguintes

CLÁUSULAS

PRIMEIRA.- Obxecto.

Este convenio ten por obxecto posibilitar aos estudantes da titulación de Grao en Ciencias da Universidade de A Coruña a realización do Practicum da materia de prácticas externas curriculares correspondentes ao Plan de Estudos de Grao en Ciencias, dentro dos programas de cooperación educativa promovidos pola entidade colaboradora Instituto Galego do Consumo e da Competencia, en diante a entidade. Ditas prácticas externas curriculares terán lugar no Laboratorio de Consumo de Galicia que o Instituto Galego do Consumo e da Competencia ten na cidade de A Coruña.

SEGUNDA.- Beneficiarios

Poderán ser beneficiarios deste programa os estudantes matriculados nalgunha titulación do Centro de conformidade co plan de estudos correspondente.

Así mesmo, non poderán ser beneficiarios deste programa os estudantes que manteñan algunha relación contractual coa entidade, ó quedar así establecido expresamente neste convenio, da cordo coa normativa interna da Universidade de A Coruña.

TERCEIRA.- Duración das prácticas

A duración das prácticas externas curriculares será a que estableza o plan de estudos oportuno, dentro do marco previsto polo artigo 12.6 do Real Decreto 1393/2007, de 29 de outubro, polo que se establece a ordenación das ensinanzas universitarias oficiais (BOE nº 260, do 30 de outubro), ou norma xeral posterior que o substitúa.

CUARTA.- Obrigas e dereitos dos/as estudantes

Durante a realización das prácticas, o estudante comprometerase a cumprir as condicións concretas establecidas para cada práctica, a realizar as actividades que a entidade colaboradora lle encomende dentro do proxecto formativo fixado, a respectar os regulamentos e as normas da entidade colaboradora, a manter absoluta confidencialidade sobre os acontecementos e os documentos da entidade colaboradora

(mesmo unha vez finalizado o período de prácticas) e a manter o contacto cos seus titores.

Os estudantes garantiránselles, en todo caso, os dereitos seguintes:

- a) Á tutela, durante o período de duración da correspondente práctica, por un profesor da universidade e por un profesional que preste servizos na empresa, institución ou entidade onde se realice esta.
- b) Á avaliación de acordo cos criterios establecidos pola universidade.
- c) Á obtención dun informe por parte da entidade colaboradora onde realizou as prácticas, con mención expresa da actividade desenvolvida, a súa duración e, se é o caso, o seu rendemento.
- d) A percibir, nos casos en que así se estipule, a achega económica da entidade colaboradora, en concepto de bolsa ou axuda ao estudo.
- e) Á propiedade intelectual e industrial nos termos establecidos na lexislación reguladora da materia.
- f) A recibir, por parte da entidade colaboradora, información da normativa de seguridade e prevención de riscos laborais.
- g) A cumprir coa súa actividade académica, formativa e de representación e participación, logo de comunicación con antelación suficiente á entidade colaboradora.
- h) A dispor dos recursos necesarios para o acceso dos estudantes con discapacidade á tutela, á información, á avaliación e ao propio desempeño das prácticas en igualdade de condicións.
- i) A conciliar, no caso dos estudantes con discapacidade, a realización das prácticas con aquelas actividades e situacións persoais derivadas ou conectadas coa situación de discapacidade.
- j) Disfrutaren dos permisos recoñecidos na legalidade vixente.

Unha vez finalizado o seu período de Prácticas, o/a estudante terá que elaborar unha memoria final de que fará entrega ao titor ou a titora académico/a. Na devandita memoria final deberán recollerse as seguintes informacións:

- a) Datos persoais do ou a estudante.
- b) Entidade colaboradora en que realizou as Prácticas e localización do centro de traballo.
- c) Descrición concreta e detallada das tarefas e os traballos desenvolvidos, así como dos departamentos da Entidade a que foi asignado/a.
- d) Valoración das tarefas executadas e dos coñecementos e competencias adquiridos en relación cos estudos universitarios.
- e) Relación dos problemas xurdidos e procedemento seguido para a súa resolución.
- f) Identificación das adquisicións que, en materia de aprendizaxe, supuxeron as Prácticas.
- g) Avaliación das Prácticas e suxestións de mellora.

QUINTA.- Obrigas da entidade

A Entidade comprométese levar a cabo o proxecto formativo correspondente, falicitado pola Universidade de A Coruña, e que realizará o alumno. Así mesmo comprométese a

respectar os dereitos dos estudantes relativos á protección dos seus datos de carácter persoal. En todo caso, o proxecto formativo ha de ser conforme aos principios de inclusión, igualdade de oportunidades, non discriminación e accesibilidade universal.

As tarefas que realizaren os alumnos en prácticas estarán relacionadas co seu nivel de estudos e de formación académica.

Despois de rematar as prácticas, a Entidade expedirá ó alumno un certificado acreditativo delas e das súas características e, ademais, remitirá debidamente cuberto ao Centro o informe de seguimento final das prácticas, no que deberán constar os seguintes aspectos:

- a) Capacidade técnica.
- b) Capacidade de aprendizaxe.
- c) Administración e organización de traballos.
- d) Habilidades de comunicación oral e escrita. Caso de estudantes con discapacidade que teñan dificultades na expresión oral, deberá indicarse o grao de autonomía para esta habilidade e se require dalgún tipo de recurso técnico e/ou humano para a mesma.
- e) Sentido da responsabilidade.
- f) Facilitade de adaptación.
- g) Creatividade e iniciativa.
- h) Implicación persoal.
- i) Motivación.
- j) Receptividade ás críticas.
- k) Puntualidade.
- l) Relacións co seu entorno laboral.
- m) Capacidade de traballo en equipo.
- n) Aqueles outros aspectos que se consideren oportunos.

SEXTA.- Obrigas do centro

De igual xeito, o Centro comprométese a convocar, difundir entre o seu estudiantado e tramitar as ofertas de prácticas que reciba da Entidade no marco deste convenio.

SÉPTIMA.- Relación entre a entidade e o estudante en prácticas.

Das prácticas non se derivarán as obrigas propias dun contrato laboral, nin terán dotación económica obrigatoria por parte da Entidade, malia que se poderá prever unha contribución en concepto de bolsa ou axuda ao estudo. Nestes casos, a entidade deberá dar de alta e cotizar polo estudante á Seguridade Social nos termos previstos polo Real decreto 1493/2011, do 24 de outubro (BOE n.º 259, do 27 de outubro), e demais normativa de desenvolvemento.

A Entidade poderá interromper unhas prácticas cando considere que o/a estudante vulnerou gravemente as súas obrigas, o que lle comunicará ao ou á representante do Centro.

Se o/a estudante se incorpora á Entidade ao acabar os seus estudos, o tempo de prácticas non se computará para os efectos de antigüidade, nin eximirá do período de proba, agás que o convenio colectivo de aplicación estipule algo distinto.

OITAVA.- Tutores

Os estudantes en prácticas que se acolleren a este programa disporán dunha tutoría académica e outra profesional.

O tutor académico será un profesor do Centro, mentres que o tutor profesional será un profesional da Entidade.

Os dous tutores supervisarán as funcións levadas a cabo polos estudantes durante as súas prácticas, asistirános no que for necesario e avaliarán o aproveitamento das prácticas.

Os tutores académicos e profesionais poderán obter da Universidade da Coruña o recoñecemento da súa actividade de conformidade coa normativa interna de aplicación.

Os tutores profesionais e académicos terán os seguintes dereitos:

- a) Ao recoñecemento da súa actividade colaboradora, por parte da universidade, nos termos previstos no presente convenio de cooperación educativa e no Regulamento de Prácticas da UDC.
- b) A ser informado acerca da normativa que regula as prácticas externas así como do proxecto formativo e das condicións do seu desenvolvemento.
- c) Ter acceso á universidade para obter a información e o apoio necesarios para o cumprimento dos fins propios da súa función.

Os tutores profesionais deberán cumprir as obrigas seguintes:

- a) Acolloer o estudante e organizar a actividade que vai desenvolver de acordo co establecido no proxecto formativo.
- b) Supervisar as súas actividades, orientar e controlar o desenvolvemento da práctica cunha relación baseada no respecto mutuo e o compromiso coa aprendizaxe.
- c) Informar o estudante da organización e o funcionamento da entidade e da normativa de interese, especialmente a relativa á seguridade e riscos laborais.
- d) Coordinar co tutor académico da universidade o desenvolvemento das actividades establecidas no convenio de cooperación educativa, incluíndo aquelas modificacións do plan formativo que poidan ser necesarias para o normal desenvolvemento da práctica, así como a comunicación e resolución de posibles incidencias que poidan xurdir no seu desenvolvemento e o control de permisos para a realización de exames.
- e) Emitir os informes que corresponda.
- f) Proporcionar a formación complementaria que precise o estudante para a realización das prácticas.
- g) Proporcionar ao estudante os medios materiais indispensables para o desenvolvemento da práctica.

- h) Facilitar e estimular a achega de propostas de innovación, mellora e emprendemento por parte do estudante.
- i) Facilitarlle ao titor académico da universidade o acceso á entidade para o cumprimento dos fins propios da súa función.
- j) Gardar confidencialidade en relación con calquera información que coñeza do estudante como consecuencia da súa actividade como titor.
- k) Prestar axuda e asistencia ao estudante, durante a súa estadía na entidade, para a resolución daquelas cuestións de carácter profesional que poida necesitar no desempeño das actividades que realiza nela.

O titor ou a titora académico/a terá as seguintes obrigas:

- a) Velar polo normal desenvolvemento do proxecto formativo, garantindo a compatibilidade do horario de realización das prácticas coas obrigas académicas, formativas e de representación e participación do estudante.
- b) Facer un seguimento efectivo das prácticas coordinándose para iso co titor da entidade colaboradora e vistos, se for o caso, os informes de seguimento.
- c) Autorizar as modificacións que se produzan no proxecto formativo.
- d) Levar a cabo o proceso avaliador das prácticas do estudante tutelado, á vista da memoria final presentada polo/a estudante e o informe do titor ou a titora da entidade colaboradora, mediante o correspondente informe.

NOVENA. Seguro escolar

Os estudantes maiores de 28 anos estarán cubertos polo seguro escolar obrigatorio que pagan coa matrícula.

A responsabilidade civil de danos a terceiros que eventualmente puider ocasionarse quedará cuberta pola póliza que a Universidade da Coruña ten subscrita para estes efectos.

DÉCIMA. Remisión aos anexos

Para cada práctica individual formalizaranse os anexos a este convenio, de acordo cos modelos que se achegan.

En cada anexo figurarán os datos do convenio de referencia; os datos persoais do ou a estudante; o lugar en que se realizarán as prácticas; o nome dos titores; as datas de inicio e fin das prácticas; o total de horas e a súa distribución temporal; o proxecto formativo obxecto das prácticas que levará a cabo o estudante; a posible bolsa ou axuda ao estudo e o tipo de seguro que dará cobertura ao ou á estudante.

As prácticas terán a validez académica que se lles outorgue no plan de estudos correspondente, no marco do Practicum, e incorporaranse ao Suplemento Europeo ao Título (SET) de conformidade coa normativa de aplicación. Cada anexo recollerá as materias o número de horas e os créditos asignados.

Os anexos será asinados polos estudantes, unha persoa representante da Entidade e outra representante do Centro ou da titulación impartida.

En caso de incumprimento, a Entidade poderá instar a rescisión anticipada das prácticas.

UNDÉCIMA.- Confidencialidade

As partes deberán respectar fronte a todas as persoas non directamente intervenientes e terceiros en xeral, unha confidencialidade estrita e rigorosa respecto a toda información, documentación e modalidades concretas de implementación de proxectos á que se teña acceso en virtude da execución do Convenio, adoptando as medidas para que o persoal vinculado directa o indirectamente ao seu cumprimento tome as medidas necesarias a tal finalidade.

DÚODÉCIMA.- Protección de datos

De acordo co Regulamento (UE) 2016/679 do Parlamento Europeo e do Consello, do 27 de abril de 2016, relativo á protección das persoas físicas, no que respecta ao tratamento de datos persoais e á libre circulación destes datos e polo que se derroga a Directiva 95/46/CE (Regulamento xeral de protección de datos, DOUE do 4 de maio), as partes comprométese a non utilizar tales datos de carácter persoal con finalidade distinta á da execución do presente acordo, a non cedelos nin comunicalos baixo ningún concepto, e en especial a non reproducir, publicar ou difundir ningunha información acerca deles.

Cada parte responderás dos incumprimentos da normativa de protección de datos de carácter persoal nos que incorra.

DÉCIMO TERCEIRA.- Comisión de seguimento.

Para a valoración global do grado de cumprimento do Convenio, créase unha Comisión paritaria de seguimento formada por dous representantes de cada unha das partes asinantes do convenio, sendo presidida por un dos representantes do Instituto Galego do Consumo e da Competencia. Está comisión é competente para resolver os problemas de interpretación e cumprimento do convenio, que puideran suscitarse.

As cuestións litixiosas xurdidas verbo da interpretación, modificación, resolución e efectos deste convenio, serán resoltas en primeira instancia pola comisión mixta paritaria. Para os conflitos eventuais e controversias que poidan xurdir entre as partes e que non poidan ser resoltas na comisión mixta, serán de coñecemento e competencia do orde xurisdiccional contencioso-administrativo.

DÉCIMO CUARTA .- Vixencia.

O presente convenio entrará en vigor o día seguinte ao da súa sinatura e terán una duración de 4 anos académicos, estendéndose ata o mes de agosto do ano 2.022.



En calquera momento antes da finalización do prazo previsto no parágrafo anterior, os asinantes do convenio poderán acordar unánimamente a súa prórroga por un período de outros catro anos académicos adicionais ou a súa extinción.

No entanto, a denuncia do convenio non afectará as prácticas que xa se viñesen realizando no momento de a efectuar.

En proba de conformidade, asínase o presente documento en todas as súas follas por triplicado exemplar e para un só e para un mesmo efecto.

En A Coruña , a 22 de 02 de 2019

Pola Universidade da Coruña

Polo Instituto Galego do Consumo e da
Competencia

Constatase expresamente que
este convenio foi
efectivamente asinado

Constatase expresamente que
este convenio foi
efectivamente asinado

